

Uorden disciplinar dil consorzi da scola dallas vischnauncas da Laax, Falera, Sagogn e Schluein

Sebasond sin igl art. 50 dalla Lescha davart las scolas popularas dil cantun Grischun (lescha da scola) dils 21 da mars 2012 sco era sin igl uorden da scola dil consorzi da scola da Laax, Falera, Sagogn e Schluein.

I. DISPOSIZIUNS GENERALAS

Art. 1

Noziuns

¹ Las denominaziuns da persunas, funcziuns e professiuns en quei uorden disciplinar serefereschon ad omisduas schlatteinas, num ch'ei seresulti enzatgei auter ord il cuntegn dils singuls artechels.

² Cun la noziun «geniturs» ein las persunas responsablas per l'educaziun manegiadas.

³ La noziun «scolar» sereferescha als affons dalla scoletta sco era allas scolaras ed als scolars dalla scola primara e dil scalem superiur.

Art. 2

Basas giuridicas e vigur

¹ La cumissiun da scola dil consorzi da scola dallas vischnauncas da Laax, Falera, Sagogn e Schluein relai in uorden disciplinar, sebasond sin la lescha da scola cantunala e sin igl uorden da scola dil consorzi da scola.

² Igl uorden disciplinar vala per tut ils scolars dil consorzi da scola.

³ Las reglas digl uorden disciplinar valan en tut ils edificis da scola, sin tut ils areals da scola e durant las occurrenzas da scola ordeifer ils areals da scola sco era durant ils transports da scola.

Art. 3

Intent

¹ Igl uorden disciplinar survescha – ensemen cun la lescha cantunala da scola, cun igl uorden da scola e cun ils uordens da casa dils loghens da scola corrispundents dil consorzi da scola – a contonscher las finamiras da formaziun tenor art. 2 dalla Lescha davart las scolas popularas dil cantun Grischun, sustegn las persunas d'instrucziun d'ademplir lur obligaziuns tenor art. 59 dalla lescha da scola cantunala e garantescha in menaschi da scola reglau e cun claras finamiras.

² Igl uorden disciplinar reglescha la cumpetenzza dalla cumissiun da scola, dalla direcziun da scola e dallas persunas d'instrucziun.

³ Igl uorden disciplinar reglescha ils dretgs e las obligaziuns dils scolars tenor art. 53-55 dalla lescha da scola cantunala sco era il proceder en cass da surpassaments dalla disciplina en scola da vart dils scolars.

II. MENASCHI DA SCOLA

Art. 4

Reglas da
secunterer

¹ Ils scolars secunteregnan andantamein e cun risguard in denter l'auter ed enviens persunas carschidas. Els vegnan all'instrucziun en vestgadira correcta e bein tgirai.

² Ils scolars ston risguardar las prescripziuns digl uorden disciplinar e suandar ils camonds dallas persunas d'instrucziun sco era dad ulteriurs collaboraturs dil consorzi da scola, dalla direcziun da scola e dall'autoritat da scola.

³ Ils scolars ston tralaschar tut quei che disturba il menaschi da scola e dall'instrucziun.

⁴ Ils scolars ston respectar ils temps d'instrucziun.

⁵ Ellas localitads da scola eis ei buca lubiu da magliar e da beiber, cun excepziun d'aua da spina. Era slogns vegnan buca tolerai. Davart excepziuns en stanza da scola decida la persuna d'instrucziun.

Art. 5

Tubac,
bubrondas
alcoholicas e
mieds narcotics

¹ Sin igl entir areal da scola eis ei scumandau da fimar e da consumar ni posseder bubrondas alcoholicas e mieds narcotics da tut gener durant il temps da scola ed occurrenzas da scola.

² La cumissiun da scola, la direcziun da scola ni las persunas d'instrucziun sancziuneschan surpassaments ed informeschan las persunas responsablas per l'educaziun.

Art. 6

Violenza

Violenza corporala e psichica ni exclusiuns vegnan buca toleradas e vegnan sancziunadas.

Art. 7

Objects prigulus

¹ Objects prigulus (cuntials, etc.) sco era tuttas sorts d'armas ed imitaziuns d'armas ein scumandai sin igl entir areal da scola sco era durant occurrenzas da scola. Las persunas d'instrucziun san lubir excepziuns per occurrenzas ni incumbensas specificas (p.ex. per excursiuns, camps, dis da project, etc.).

² La direcziun da scola sa slargar il scamond sin auters objects ni utensils che pericliteschan ils scolars ni disturban il menaschi da scola.

³ Las persunas d'instrucziun e la direcziun da scola san far controllas da tut temps e confiscar objects.

Art. 8

Products
stampai,
medias
electronicas

¹ Igl ei buca lubiu en scola e sin igl areal da scola da tener en salv, distribuir ni derasar products stampai, medias electronicas ni ulteriurs products digitals che pericliteschan ils scolars moralmein ni psichicamein.

² Igl ei scumadau expressivamein da derasar cuntegns electronics illegals. Surpassaments vegnan denunziai.

Art. 9

Apparats
electronics

Sin igl areal da scola eis ei da sclauder ni metter offline apparats electronics persunals (telefonins, smartphones, smartwatches, etc.) durant il temps d'instrucziun e las pausas ufficialas. La persuna d'instrucziun ni da survegionza sa decider davart excepziuns. Sch'in apparat vegn duvraus senza lubientscha, astga la persuna d'instrucziun confiscar igl apparat.

Art. 10

Locals,
mobiliar,
apparats

¹ Ils scolars han quitau dil mobiliar, dallas localitads e dils stabiliments ordaviert sco era dils apparats e dil material da scola. Per donns intenziunai stattan ils geniturs dils scolars ch'ei responsabels per ils defects buns.

² Ellas localitads da scola eis ei per ils scolars da principi obligatori da trer en scalfins.

³ Ils scolars astgan esser ellas localitads da scola mo durant ils temps d'instrucziun ufficials. La persuna d'instrucziun ni da survegionza sa decider davart excepziuns.

Art. 11

Temps da
scola, pausa,
uras libras

¹ Ils temps da scola ein da risguardar. Durant il temps d'instrucziun astgan ins buca far canera els zulers e sin il plaz da pausa. Ils scolars astgan serender ellas localitads da scola, per cura ch'ei scalina.

² Durant pausa ein ils scolars per regla ordaviert resp. sin il plaz da pausa, nua che las personas d'instrucziun survegileschan els.

³ Bandunar igl areal da scola durant pausa e las uras libras astgan ils scolars mo cun lubientscha explicita dad ina persuna d'instrucziun.

⁴ Sin il plaz da pausa eis ei scumandau da fierer bottas, tocca da glatsch, crappa ni caussas semegliontas.

Art. 12

Viadi a scola

¹ Il viadi a scola ei el camp da responsabladad dils geniturs.

² Las reglas da secuntener valan era durant ils transports da scolars.

³ Per ils transports da scolars organisai dalla scola vala il reglament da transports dil consorzi da scola.

III. TEMPS LIBER

Art. 13

Responsabla-
dad,
activitads da
temps liber

- ¹ Ordeifer il temps da scola ein da principi ils geniturs responsabels per lur affons.
- ² Arisguard l'organisaziun dil temps liber vegn recumandau che scolars tochen il sisavel onn da scola senza accumpignament da persunas carschidas seigien a casa sil pli tard allas 21.00, scolars dil siatavel tochen novavel onn da scola sil pli tard allas 22.00.

IV. FATGS DISCIPLINARS

Art. 14

Castitgs
disciplinars

- ¹ Surpassaments dalla lescha da scola, digl uorden da scola, digl uorden disciplinar ni digl uorden da casa sco era d'ulteriurs uordens e d'ulteriuras directivas san vegnir puni cun admoniziuns, lavurs da castitg, lavur speciala ni cun in'exclusiun dalla classa limitada temporalmein.
- ² La lavur speciala succeda cun occupaziun sut survegionza (arrest).
- ³ Il cuoz maximal per lavur speciala munta a diesch mezs dis per surpassament. Tals castitgs specials san era vegnir exequi durant ils dis libers (mesjamna, sonda) ni durant las vacanzas da scola.

Art. 15

Cumpetenzas

- ¹ Castitgs disciplinars vegnan ordinai dalla persuna d'instrucziun, dalla direcziun da scola ni dalla cumissiun da scola.
- ² La persuna d'instrucziun sa ordinar in'admoniziun a bucca ni en scret, ina lavur da castitg e lavurs specialas d'entochen dus mezs dis per surpassament.
- ³ La direcziun da scola sa ordinar in'admoniziun a bucca ni en scret, lavurs da castitg e lavurs specialas d'entochen diesch mezs dis per surpassament.
- ⁴ La cumissiun da scola sa ordinar tut ils castitgs disciplinars sco era proponer – tenor las directivas concernent absenzas, congedi e dispensaziun dall'instrucziun dil cantun Grischun – agl inspektorat da scola d'excluser in scolar dall'instrucziun.

Art. 16

Audiziun
giuridica

- ¹ Tier in cass disciplinar eis ei da sclarir il gener e las circumstanzias dil surpassament disciplinar. Ils scolars pertuccai ston vegnir tedlai.
- ² Survarga il castitg ordinau dus mezs dis, eis ei da tedlar ils geniturs avon la decisiun definitiva. Sin damonda sto ina decisiun che suttastat al dretg da recuors vegnir relaschada.

V. MIEDS LEGALS ED EXECUZIUN

Art. 17

Recuors e protestas

¹ Encunter las decisiuns davart castitgs disciplinars dalla persuna d'instrucziun sa vegnir fatg recuors tier la direcziun da scola enteifer diesch dis da lavur.

² Encunter las decisiuns davart castitgs disciplinars dalla direcziun da scola sa vegnir fatg recuors tier la cumissiun da scola enteifer diesch dis da lavur.

³ Encunter las decisiuns davart castitgs disciplinars dalla cumissiun da scola sa vegnir fatg recuors tier il Departament d'educaziun, cultura e protecziun digl ambient dil cantun Grischun enteifer diesch dis.

Art. 18

Execuziun

Las personas d'instrucziun ein responsablas per l'execuziun dil castitg disciplinar ch'ellas han ordinau. Ellas san surdar l'execuziun ad in'otra persuna d'instrucziun ni a tierzas personas.

Art. 19

Purtar plogn

La cumissiun da scola, la direcziun da scola e las personas d'instrucziun han il dretg e tut tenor grevezia dil cass l'obligaziun da purtar plogn tier la polizia ni d'informar l'autoridad per la protecziun digl affon e da carschi.

Art. 20

Informaziun

Las personas d'instrucziun, la direcziun da scola e la cumissiun da scola san informar ina l'otra davart ils cass disciplinars, observond ils dretgs dalla persuna e la proporziunalitad.

VI. DISPOSIZIUNS FINALAS

Art. 21

Entrada en vigur

Igl uorden disciplinar ei vegnius approbaus dalla cumissiun transitoria ils 21-6-2022 ed entra en vigur l'entschatta digl onn da scola 2022/23. El remplazza ils uordens disciplinars communalis d'entochen ussa sco era quel dalla Scolaviva.

Schluein

21-6-2022

Per la cumissiun transitoria

e.sub. presidents communal:



Candrian Thomas, Sagogn



Casutt Wendelin, Falera



Gschwend Franz, Laax



Schläpfer Ralf, Schluein